

四庫全書

子部

欽定四庫全書

子部

古今事文類聚新集卷三十二至

六

詳校官中書

臣沈颺

侍讀臣孫球覆勘

總校官編修

臣王燕緒

校對官中書

臣王家賓

膳錄監生

臣武先振

欽定四庫全書

古今事文類聚新集卷三十二

元 富大用 撰

諸監部

太府監

歷代沿革周官太府下大夫秦漢以下不置然其職在
司農少府至梁天監置夏卿即太府卿掌財物庫藏
北齊兼掌進貢器物後周太府中大夫掌貢賦貨賄

以供國用屬大冢宰隋初與北齊同所掌左右藏及
尚方司染等署煬帝分太府寺為少府監管尚方織
染等署但管京都市及平準左右藏唐因之卿一人
少卿二人掌財貨廩藏貿易總京師四市左右藏常
平七署凡四方貢賦百官俸秩謹其出納賦物任土
所出定精麤之差祭祀幣帛皆總焉龍朔改太府為
外府正卿咸亨復光宅改為司府中宗神龍復曰太
府宋太府寺判寺事一人以兩制或帶職朝官充凡

財貨廩藏貿易四方貢賦百官俸秩皆隸三司本寺但掌祠祭香幣帨巾神位席及造斗秤升尺而已元豐改制始正職掌掌財貨出納貿易之事凡貢賦之輸於京師者至則別而受之供君之用及待邊費則歸於內藏供國之用及待經費則歸於左藏元祐三年詔太府寺置長貳餘寺監長貳互置建炎三年詔罷太府寺撥隸金部獨以一丞治鹺茗之質劑凡省五年而後復置元改寺為監置監一人少監一人丞二

人掌出納邦國財用錢穀之事管轄左右藏諸倉坊
學署

羣書要語古名少府

六帖

治藏之長

鄭康成周禮注

太府

周禮

司府

鄭氏談綺

掌九貢九賦九功之貳以受其貨賄之入頒其貨

于受藏之府頒其賄于受用之府凡頒財以式法授之

周禮

凡萬民之貢以充府庫凡式貢之餘財以供玩好之用凡

邦之賦用取具焉

同上

以二法平物一曰度量二曰權衡

唐百官志

唐舊制天下財賦皆納於左藏庫而大府四時以

數聞續通典

財賦總於地官而太府司其出納非明於金

穀之要不在茲選

南豐集

居監臨之官典出入之務

唐制領

貢獻於四方掌財用於五庫况當貢賦之入宜重帑藏

之司

同上

九卿之重叅理於佐邦六府孔脩頒貨於別藏

常集太府卿制

會帑藏出入之要修權量平校之法

白集太府卿制

受

藏之府國用所資同上經紀有品臣子攸同

揚雄少府藏

古今事實

省閱錢帛

楊崇禮開元為少卿雖錢帛充牣丈尺皆躬自省閱時以為前後無與為比擢拜太府卿時太平日久御府財物山積以為經楊卿者無不精好

唐本傳

專任錢穀

楊國忠判度支玄宗觀左藏庫喜其貨幣山積面賜國忠金帛權太府卿國忠專錢穀之任出入禁中日加親幸

為人嚴慤

李襲譽召為太府為人嚴慤以威肅聞

任職清白

楊隆禮任職二十年九十餘卒隆禮罷太府玄宗訪其子可代父任者宰相以其子慎餘慎矜慎名皆得父清白帝擢慎矜監察御史知太府出納

並同上

古今文集

雜著

太府寺廳壁記

鄭湜

太府周官也凡邦國之賦用取具焉漢以大農領軍國之經費而少府給縣官之私養分畫與古不同故太府之官缺置卿自梁後魏始也隋唐因之實與版曹相為管鍵以制邦財國初財賄出納阜通之政顯領於三司太府所掌惟奉帑幣頒權度而已元豐治官盡循唐舊中興初并省附於金部獨以一丞治鹺茗之質劑凡省五年而後復馬承家蓋初除也初元豐以在京司局分屬寺監而太府局二十有四今雖頗省猶劇於他寺以

式班內外之廩稍覆其名數而鈎磨之則諸軍諸司糧
審四院屬焉頒財用於受藏之府周知入出而會之則
左藏東西兩庫屬焉時禁省官府之需以贖用物則買
務屬焉比物莫賈俾從其抵則編套兩局屬焉藥石必
良以除札瘥則和劑惠民四局屬焉叙財幣以待上之
賜好則祇候庫屬焉制券之短長以通商則鈔引庫屬
焉所異於元豐者惟內藏奉宸不外屬權貨額隸於都
司蓋經財制用有不同爾寺凡再徙面執非宜與塵囂

溷今寺故勅局也淳熙十有五年夏局罷白於朝以為
寺秋七月乃遷閤與顯厰稱其官府寺故有題名歲久
官溢不足登載離為三四叢猥不章不與寺稱於是欲
更營穹石叙次官氏歲月而鏡之同舍或遷或去不果
就惟曾君三復曩嘗預遷議再除復來為丞實終始之
以成同舍之志以湜於是寺也為有舊移書命之記不
得辭因考其沿革繫於碑端并識遷焉紹熙元年正月
四日鄭湜書

太府寺廳壁記

耿秉

周官三百六十名存於今而職不異者太府一官耳周制下大夫二人上士四人下士八人設屬若是其衆非以其事繁而職重歟故鄭氏謂為主治藏之長秦漢迄隋併置不常上下千載何寂寂咸無可紀也豈出內之者僅云有司他非所及耶抑卓偉之才偶不相直耶若曰士舉不逮古則焉敢厚誣獨唐開元中楊宗禮任職二十有年有公清之譽性特詳密雖尋尺皆自按省凡物

經楊卿者無不精麗吾猶憾焉以其未聞君子之大道也國初省部寺官惟以寄祿寺則光祿太常宗正衛尉司農大理或以卿或以監或以丞各寓一階別設主判之官以典事惟太府則否其職撥入三司諸按故主判之任罕置逮元豐釐正中更多故歲久莫詳高宗中興駐蹕臨安任職者始可以歲月考史祺孫為題壁記實首以紹興四年然長貳丞簿區分各記或繁或稀題續不齊僉欲易為編年秉承乏伯臣比修玉牒恭覲壽皇

聖帝理財之訓有曰生之者寡食之者衆為之者舒用之者疾財計安得不匱大哉王言深知民生之不易用度之宜節秉謂司府之官尤不可不知此適茲兼官少列舉聖謨以語同僚謹識於題名之首其續刻則有鄭湜為之記紹興改元正月丙辰朔耿秉記

少監

歷代沿革後魏孝文帝改少府為太府置少卿一人比齊因之隋煬帝加至一人唐減一人貞觀中復龍朔

咸亨光宅神龍並隨寺改復宋太府寺同判寺一人
以京朝官充元豐正名置少卿一人以為卿之貳元
祐三年詔太府長貳並置餘則否建炎中興省紹興
四年復元少監一人

羣書要語財賦總於地官而天府司其出納

曲阜制

九賦

頒受之政百貨貿遷之法典領之任位次列卿

南豐集

出

納之地眷求惟精兼領三尚之頒以榮四至之列

古今事實

問孫卿年

後魏孫詔為少卿問年老對曰臣年雖老臣節尚少

畏尹卿筆

尹思盾為司府少卿時侯知一亦厲威嚴吏人為之語
曰不畏侯卿杖惟畏尹卿筆

古今文集

雜著

謝除太府少卿表

周必大

將命江淮久塵星省疏榮觀缺驟亞月卿念委寄之不
移知私恩之愈厚伏念臣寒鄉晚出薄宦卑飛叨逢顧
俊之秋濫綴登畿之數粵負丞於外府旋列屬於中臺
所懼汰歸乃膺臨遣給餉坐兼於兩路空餐行及於再
暮自量心計之非長常恐使華之不稱竊思載籍具有
前模流馬木牛葛亮創蜀中之運輦車驪駕寇恂資河
內之軍彼皆值於行師尚不聞於乏事矧說劍索弓之
後無飛芻輓粟之勤第鈎考於簿書粗幹旋於金穀論

功何有竊位則多已慚假寵於諸郎更許叅華於七寺
中負梁鵜之刺徒驚晉馬之蕃此蓋伏遇皇帝陛下大
智溥臨深仁徧覆灼知能否故雖遠而不遺力勸事功
凡有長而必錄爰茂出綸之渥悉褒總賦之臣遂致下
愚亦升少列臣敢不仰承睿眷俯竭駑才無廢前勞少
助足食足兵之政更圖後效永肩惟忠惟孝之心

監丞

歷代沿革丞於周官為太府上士之任梁選部太府丞

一人陳因之後魏亦一人後周曰太府上士隋又曰
太府丞六人唐四人宋元豐改制置丞二人元符中
增一員崇寧中置藥局又添丞一員宣和中省一員
建炎三年罷太府寺紹興三年置一員叅預寺事元
置丞二人

羣書要語太府掌邦國之出入而丞屬分治衆務

職畧

太

府受邦國之出入而設丞屬俾預叅贊欲勝是任必惟

其人

宋朝制

唐寺丞掌判寺事凡正大朝應貢方物應陳

於殿庭者皆受而紀之

分紀

古今事實

置印給鈔

宋紹興初章億守太府丞措置印給茶鹽鈔引

會要

左右藏庫

使副
使附

歷代沿革周外府主泉藏之在外者內府主良貨賄藏
於內者又有職內職幣主泉貨所入並今左右藏之
職秦漢分在司農少卿屬官有中藏府令丞各一人

掌中藏幣帛金銀貨物魏因之晉少府屬官始置左右藏令東晉置御史九人各掌一曹有庫曹御史後復分庫曹置外左庫內左庫宋文帝省外左庫而內左庫直云左庫武帝復置前廢帝又省齊梁陳有右藏無左藏後魏缺北齊太府寺初統左右藏令丞後周有外府上士中士二人掌綿帛絲麻錢物皮角筋骨之藏隋有左右藏署令丞隸太府寺唐以太府少卿知出納左藏止一五代始置宋因之用直使領焉

太平興國二年分為二庫淳化三年分置左右藏各
二庫四年廢右併入左政和六年修建新庫以東西
庫為名中興因仍東西庫各以文臣監武臣同監其
東幣帛純紬之屬在焉其西金銀泉券絲纊之屬在
焉紹興二十七年詔戶部於轄下巡簿內選一員兼
充左藏庫提轄官此提轄所由始也孝宗即位詔將
御前樁管激賞庫撥歸左藏庫以左藏南庫為名專
一樁管應副軍期支遣於是有東西南三庫尋罷南

庫大抵國家用度多縻於贍軍西蜀湖廣江淮之賦類歸四總領所以餉諸屯其送京者殆無幾唯閩浙悉輸東西庫歲入以端計者率百四十萬以緡計者率二十萬給遺稱是以大軍居十之七宮禁百司祿賜裁三之間有非泛浩繁之費則請於朝往往出內帑封樁以補所缺監官凡五人分帑而治舊以京朝官為之今唯才是用故四選通得入先是四轄官外補則為州內遷則寺監丞亦有徑為雜監司或入三

館者近歲望稍輕往往更遷六院官或出為添倅非
長貳之比矣元左右藏庫各置使一人副使一人右
藏又有支應使都監左藏金銀珠玉寶貨錢幣右藏
掌錦帛絲綿毛褐諸道常課諸色雜物

羣書要語外府掌邦布之入出以供百物而待邦之用

凡有法者周禮職內掌邦之賦入 職歲掌邦之賦出並同

上內庫曰御府謝承後漢書離珠為藏府在須女北天文要集天

積者天子藏府也同典司國帑公是行曹佚制特陞治藏之名

李常
制 受藏之府國用所資

白集行
裴武制

古今事實

庫藏充滿

後魏王顯謂楊固曰吾作太府卿庫藏充滿固曰減百
官之祿及贖贖悉入京藏以此充足未足為多

貨幣山積

唐玄宗召公卿百僚觀左藏庫貨幣山積

皆納於庫

唐制天下財賦皆納於左藏庫

不同諸司

狄兼舉對唐文宗封勅問不同諸司

云

云

召試直集賢

程文簡公琳監左藏庫天禧中詔選文學履行召試直

集賢院

六一集

高科滯筦庫

韓琦監左藏庫時方貴高科多徑去為館職公獨滯於

筦庫衆以為非宜公處之自若不以為卑冗職事未嘗苟且禁中須索金帛皆內臣直批聖旨下庫公奏天禧中嘗專置傳宣合同一愿復舊制詔從之舊有監秤內臣一員綱運至必監秤始得交納內臣徃徃數日不至寶貨皆暴露廊廡遠方衛校苦於稽留公奏罷之災傷州郡所輸物帛不如度者例猶追剥公請蠲之

言行錄

太倉

使副使附

歷代沿革太倉周司徒屬官有廩人倉人則其職也秦

漢大司農屬官有太倉令丞各一人文帝時淳于意為之後漢一人六百石魏品第七晉宋齊梁陳皆然後魏缺北齊置令丞亦隸司農所統後周有司倉下大夫隋置令二人唐三人宋豐儲倉掌九穀廩藏之事以給官兵祿食之用紹興三年改行在省倉內鎮城倉為南倉仁和倉為北倉監官四員並兼管幹和糴隸司農寺元太倉隸太府監置使副各一人掌九穀廩藏出納之事

羣書要語國無九年之蓄曰不足無六年之蓄曰急無

三年之蓄曰國非其國也禮記曾孫之庾如坻如京詩乃

求千斯倉

詩

國廩罕蓄乏九年之儲

唐策問

中都儲積

會要

服勞廩委

公是行劉裕制

龠合升斗斛職在太倉掌之

漢律歷志

詩句閒曹猶得醉薄俸亦勝耕

唐方干寄賈司倉詩

身到瀛洲須

是好官稱庾氏莫言卑

何斯舉寄錢監倉

古今事實

倉粟紅腐

漢武帝太倉之粟紅腐而不可食

天倉天困

天倉六星在婁南倉穀所藏南三星天庾積厨粟之所

天困十二星困倉廩之屬主御糧也

石氏
星經

老於掌庾

宋祥符九年詔京師官年六十已上勿差監在京諸倉
時國子博士雍文載年六十五受勅上言求免上曰京
倉自受納至給畢殆六七歲者若此輩一任則老於掌

庾矣因著式焉

長編

記其姓名

梁莊肅公適景祐中監在京倉南郊赦錄朱全忠後莊肅上疏罷之曰全忠叛臣何以為勸仁宗善之擢審刑院詳議官記其姓名禁中自是遂見擢用

石林燕語

酒坊

使使附副

歷代沿革酒坊使唐官周太祖平河中得酒工王思善造法麴酒因置法酒庫使宋初酒坊使加內字後去

之紹興八年戶部尚書章誼請置贍軍酒庫於行在
即命司農寺丞蓋諒主之賜浙東總制錢五萬緡為
釀本其後歲收息錢五十萬緡元酒坊置使副

古今事實

兼檢討官

陳居仁字安行監贍軍酒庫所糴場隆興改元修高宗
聖政兼檢討蓋異遷焉

周益
公集

市買司

使副
使附

歷代沿革神農始作市周地官有司市其屬有質人鄺人胥師賈師司虺司稽肆長蓋諸市官也漢改秦內史為京兆尹屬官有長安市長丞後漢河南尹屬官有雒陽市長丞魏晉因之東晉隸丹陽尹宋齊因之梁始隸太府陳因之後魏京邑市令從五品中北齊司州牧領東西市署令丞後周司市下大夫一人隋司農寺統京市令煬帝三年改隸太府寺唐因之京置東西南三市宋新賣務舊曰市買司太平興國四

年改至道中廢咸平中復置以京朝及三班內侍三人監掌和市百物凡宮禁官物所需以時供納雜賣務景德四年置掌受內外幣帛之物計直以待出貨或準折支用以內侍及三班二人監後亦差文武朝官紹興六年詔雜買務雜賣場置提轄官一員元市買司置副使

羣書要語地官司市

周禮

懋遷有無化居

書

日中為市致

天下之民聚天下之貨交易而退蓋取諸噬嗑

易司市

掌市之治教政刑量度禁令以次序分地而經市以陳

肆辨物而平市以政令禁物靡而均市以商賈阜貨而

行市

周禮

司市凡會同師役市司帥賈師而從治其市政

掌其賣儻之事

同上

委權筦之務

白六帖

周有泉府之官斂

不售與欲得

漢書

以二物平市以三賈均市

六典

太府總京

師四市平準所以遷有無和利用

同上

漢武帝置平準官

籠天下之鹽鐵於京師

古今事實

奉法不避

祭遵從征河北為軍市令舍中兒犯法遵格殺之上怒
命收遵主簿陳副諫曰明公常欲衆軍整齊今遵奉法
不避是教令行也上乃貸之以為刺奸將軍語諸將曰
當避祭遵吾舍中兒尚格殺之必不放諸卿也

以廉自將

潘峙字德鄺提轄雜買務雜賣場嚴禁防謹次第大官
要人無敢干以私皇城邏卒挾持干紀公按致其罪不

少貸人為公危之然公以廉白自將其黨雖怨之卒無

以報也

朱文公集

論皆大計

趙粹中監行在雜買雜賣雖在筦庫論當世事皆天下
大計人屬望以為國器

不售一物

呂好問字舜從監在京雜賣場正獻公當國任事者以
公親宰相孫閣其條約不以簿領累公公益自厲日夜

治文書若有程督之者時以樸素先天下四方貢獻一
歸之有司斥賣以佐經費吏或下其估以自私公獨漠
然不見終秩未嘗售一物

東萊
集

古今事文類聚新集卷三十二

欽定四庫全書

古今事文類聚新集卷三十三

元 富大用 撰

諸監部

少府監

歷代沿革少昊氏五雉為五工正唐虞共工周官考工
皆其職也秦有將作少府掌治宮室又別有少府掌
山海池澤之稅以給共養漢因之將作少府掌修飾

宗廟路寢宮室陵園木土之工而少府則掌山澤陂池之稅實為二官景帝中改將作少府為將作大匠世祖中興以謁者領其官章帝建初又置少府卿一人掌中服御諸物衣服寶貨珍膳之屬統尚方畫家織室等令晉少府亦為列卿統材官校尉中左右三尚方甄官等令宋少府領左右尚方御府等令丞齊梁陳皆有北齊不置少府其三尚方司染諸治及細作甄官等署並隸太府寺至隋煬帝大業中始分太

府少府監唐武德九年分將作為少府監龍朔二年
改少府監為內府監咸亨復舊光宅元年改為尚方
監神龍復舊開元初分甲鎧弓弩別置軍器監十二
年省歸少府少府監掌百工伎巧之政令總中尚左
尚右尚織染掌治五署將作監掌土木工匠之政總
左右中校甄官等署百工等監少監為之貳宋少府
置監少掌百工伎巧之事將作亦置監少掌城壁宮
室橋梁街道舟車凡營造之事中興後將作少府未

置建炎三年始併歸工部紹興三年復置將作監而
少府監併歸文思院元省將作監止置少府監少監
各一人丞二人掌邦國百工營造之事管轄文思尚
方圖書裁造文繡織染甄官七署

羣書要語垂汝共工

書舜典

大宰以九職任萬民五曰百

工飭化八材

周禮

開閉將作經構宮室牆以禦風宇以蔽

日寒暑攸除鳥鼠攸去主有宮殿民有室居

楊雄將作大匠歲

漢尊任隗始為置員晉寵王彬且聞賜爵

六帖

別為收藏

故曰少府技巧工匠自元成間鮮能及之亦足以知吏

稱其職民安其業也

前漢宣
帝紀

詩句柱枅欂櫨相支持

漢武帝柏梁詩
將作大匠云

古今事實

王觀守法

王觀徙少府大將軍曹奭使材官張達斫伐屋材及諸
私用之物觀聞之皆錄奪以沒官少府統三尚方御府
內藏玩弄之寶奭等奢放多有干求憚觀守法乃徙為

太僕

師度相地

姜師度為將作大匠師度喜渠漕所在徭役紛紜不能
皆便然所就必為後世利是時太史令傅孝忠以知星
顯時為語曰孝忠知仰天師度知相地

受一大錢

劉寵自會稽太守徵為將作大匠有老叟五六人持一
百錢送寵寵為選一大錢受之

省億萬費

後漢應順字華仲為將作大匠發擿衆奸皆極其刑豪
猾之吏屏迹視事五年省費億萬又應順遷大匠發擿
奸伏除藻飾之無用割有損之浮費所省息十億餘萬
勤苦賜秩

前漢馬延年為將作大匠成帝以勤苦賜秩二千石

營創賜侯

晉王彬為大匠以營創勤勞賜闕內侯遷尚書左僕射

作玉真觀

唐尹思貞為將作大匠僕射竇懷貞護作金仙玉真觀
廣調工匠思貞數有損節懷貞讓之答曰公輔臣也不
能宣贊王化而土木是興又聽小人譖以廷辱士今不
可事公矣乃拂衣去

修九成宮

姜行本為將作大匠太宗修九成宮行本總領之以勤
濟稱旨賞賜甚厚

度用省費

漢應華仲為大匠度用省費

崇飾雕麗

竇璡字之推為將作大匠修葺洛陽宮中鑿池起山崇飾雕麗虛費功力太宗令毀之

工無虛張

鄧豹字伯達遷大匠工無虛張之繕徒無飢寒之色

躬親作工

後漢陳伯直為將作大匠桓帝崩營陵寢皆躬親作工為士卒先

築道為橋梁

閻立德從太宗征遼淖不可通築道為橋梁賜予良厚
上疏省宮人

楊阜字義山為將作大匠明帝時治宮室發美女充後庭阜上疏欲省宮人諸不見幸者乃召御府吏問後宮人數吏守舊令對曰密禁不得宣露阜怒杖吏一百數

之曰國家不與九卿為密乎帝聞愈敬憚

古今文集

雜著

將作監廳壁記

孫祖壽

漢九卿將作大匠沿襲秦官亦少皞氏以五雉為五工
正以利器用唐虞共工周官考工之職也歷代雖因革
不一大率典司皆營繕土木之事隋開皇中始定以寺
為監唐天寶中始定以長貳為監少丞自漢置主簿自

晉置員之多寡亦不同焉本朝蓋因唐制主上再造丕
基承平官府寢亦如舊紹興三年冬十月復監置丞十
年冬十月置主簿明年夏四月置長貳官適少府未復
文思軍器兩監分領其所繇自監設官二十寒暑因循
苟且題名未立吏書粉版不足示後祖壽監掌勾稽與
丞信安徐宗愈為寮議立石未遂徐既補外臨安錢端
英繼承事始克就因叙梗槩以揭其首云紹興二十三
年秋七月庚戌右朝奉郎行將作監主簿廣陵孫祖壽

記將作監題名紹興癸酉始鋟木以易粉版慮其易蠹
不足垂久旣伐堅珉未暇今也繇隆興而末上法慈訓
躬履儉約宮室無所營繕器用不作車服從給職務益
省矣於是長貳久闕勾稽之職亦復不除猷以丞兼治
其事歲在戊子峴由太府丞以嫌自列乃獲踵伯父伯
氏後陳懼無以稱明年二月礮石改舊刻歷考所載名
氏凡三十年間由簿而上執國政者二人持從索者九
人今之有列於朝者陳公少常伯楊公次對朱公貳外

府張公奉內祠伯氏為尚書郎亦可謂盛矣顧峴之不肖亦得濫次其間有榮耀焉碑既具乃以舊記冠其首而私著其事以告來者乾道五年三月八日右通直郎將作監丞蘇峴謹述

將作監題名記

京鏜

將作古官也在秦曰少府在漢曰大匠在北齊曰寺至隋唐始以監名國朝因之南渡以來在所營繕之事有府尹畿漕分其責由是職閒無事監少屢虛丞簿互兼

者久之比年人才盛多樂於彙進監丞簿無缺員凡
臺省之久次與都邑之有聲者悉寄徑于此今號為儲
才之地舊有題名各以類分逮鏜承乏為監欲託諸不
朽而石已無餘訪之他山會移都司不果今開封韋璞
實繼鏜後明年得堅珉與丞清原諸葛廷瑞部丹陽霍
筦議變例為編年俾鏜記之竊謂官無中外亦無劇易
均於事主報國而已吾儕立乎人之朝要當洗濯故習
磨礱壯志相期姓名於簡冊之上庶於金石有光焉若

曰吾於是乎紀年月志族氏以侈後觀則恐雨淋日炙
無復摩挲徒為後人作硯石爾其念之哉淳熙十四年
十月記

少監

歷代沿革後周有少匠下大夫隋置少監一人唐二人
龍朔咸亨光宅神龍並隨監改復宋元祐官品令少
監從六品建炎中併歸工部紹興三年詔復置監少
元少監一人

羣書要語少匠之職實司營繕

初察除賈制

來貳繕工

同上除侯

益制總尚方工巧之物置監總之輟爾郎曹往服少事

古今事實

以幹力稱

唐姜確字行本貞觀中為將作少監護作九成洛陽宮有巧思及諸苑籞以幹力稱凡營繕所司必諮而後行帝游幸無不從魏徵恐寢啓侈端勸帝斥之

以工巧進

楊務廉為少監以工巧進宰相袁恕已恐啓游娛侈利之漸言於中宗曰務廉忠言嘉謨不聞而專營構以媚上不斥之無以昭德

監丞

歷代沿革漢置六人皆千石後漢置一人以明法魏晉因之宋齊梁陳皆一人梁班第四後魏二人從五品中隋煬帝分太府寺置少府監置丞二人唐加至六人龍朔咸亨光宅神龍並隨監改復開元二十三年

減二人宋制官品令監丞八品元置二人

羣書要語監丞掌判監事凡五署所修之物須金石齒革羽毛竹木而成者則上尚書省下所由司以供給焉

唐六
典

古今事實

營繕不奢

宋李大有字仲謙除將作監丞營繕不奢忤用事意奪一官上察其不阿詔勿奪西北用兵國力大屈朝廷置

司講議以漁利又詔天下計稅輸免夫錢率以乏興論
百姓騷然公極言不可

胡澹庵集

薦對改官

翁挺字士特有詩名靖康中何文鎮薦對改除少府監
丞

文思署

歷代沿革宋太平興國三年置掌造金銀犀玉工巧之
物金綵繪素裝鈿之飾以供輿輦冊寶法物及凡器

服之用隸少府監熙寧三年詔文思院兩界監官立
定文臣一員武臣一員並朝廷選差其內侍勾當官
並罷紹興三年詔少府監併歸文思院其上下界監
官從工部辟差工部言所轄文思院舊分上下界監
官三員內一員文臣係京朝官上界造作金銀珠玉
下界造作銅鐵竹木雜料欲依舊分為上下界從之
隆興三年詔併禮物局入文思院元署置令丞隸少
府監

羣書要語工正

莊子

工尹

左傳

季春之月命工師令百工審

五庫之量金鐵皮革筋角齒羽箭幹脂膠丹漆毋或不

良百工咸理監工日號毋悖于時

記月令

孟冬之月命工

師效功陳祭器按度程毋或作為淫巧以蕩上心必功
致為上注工師工官之長也效功錄見百工所作器物

也

同上

尚方署

歷代沿革漢少府屬官有尚方令丞後漢一人其後分

為中左右魏因之晉過江左唯置一人宋高祖以相
府部配臺謂之左尚方而本署謂之右尚方令丞各
一人武帝改右尚方曰御府又置中署隸右尚方齊
置左右尚方令丞一人梁置左中右三尚方令其丞
令並從九品其後廢中尚方陳因之北齊三尚方隸
太府隋開皇有內左右三尚方猶屬太府寺內尚方
令二人正八品下掌諸織作煬帝分屬少府唐省方
字有中左右三尚署令丞各一人開元已後別置中

尚使以監之元署置令丞直長

羣書要語唐中署掌供內營造雜作左署掌造車輦工
扇弓箭箭弩戟器仗等右署掌造甲冑裝刀斧鉞等

職林

古今事實

將作秘劍

宦者蔡倫為尚方令監作秘劍及諸器械莫不精工堅

密為後世法

後漢史

奪賜錦袍

宋之問累轉尚方監丞右奉宸內供奉常扈從遊宴則
天幸洛南龍門令從官賦詩左史東方虬詩先成則天
以錦袍賜之及之問詩成則天稱其詞愈高奪虬錦袍
以賞之

唐史

古今文集

雜著

尚方令箴

後漢崔寔

煌煌尚方古之玉府九貢是中百珍是聚玉以享神珠

以扞禦崗革三金寶餉器械上下有章不虞用戒

織染署

歷代沿革周禮九職嬪婦化理絲枲考工記理絲麻而成之謂之婦功漢初少府屬官有東織西織成帝省東織更西織為織室後周有司織下大夫隋煬帝署司織署令丞後並為織染署周禮天官有染人冬官有設色之工五謂畫繪鐘筐幌也兩漢平準令主染色並隸司農晉平準令有監染吏六人初隸司農

後屬少府宋順帝名準始改曰染署令齊復為平準
令北齊太府寺有司染署長秋寺有染局丞後周有
染工上士一人又有司色下大夫一人隋初有司染
署隸太府煬帝分屬少府大業五年令司織司染為
織染署令二人唐置一人元署置令丞直長

羣書要語掌供天子皇太子及羣臣之冠冕辨其制度

而供其織務凡織紵之作有十

布絹純紗綾
羅錦綺蜀褐

組綬之作

五

組綬條
繩縷

紬線之作四

紬線
絁網

練染之作六

青絳黃
白皂紫

凡染

大抵以草木而成有以花葉有以莖實有以根皮出其
方土採以時月皆率其屬而修其職焉

唐六
典

甄官署

歷代沿革周禮埴埴之工二謂陶與甄也後漢將作大
匠屬官有前後中甄官令丞晉少府領之宋齊有東
西陶官瓦署督令各一人後周有陶工中士一人掌
為埴埴簠簋等器隋太府統甄官署令宋改屬將作
元署置令丞直長

羣書要語掌供琢石陶土之事

唐六
典

古今事文類聚新集卷三十三

欽定四庫全書

古今事文類聚新集卷三十四

元 富大用 撰

諸監部

軍器監

歷代沿革後周武帝四年置軍器監隋少府統鎧甲弓弩等局唐武德初有武器監一人掌兵仗廩牧開元以前軍器皆出右尚署三年分少府甲鎧弓弩置軍

器監宋初軍器領於三司曹按官無專職熙寧六年廢曹案乃案唐令置監擇侍從官總判元豐正名分按五設吏十有二總局五掌造軍器及什物之事凡製器以法式授衆工其弓矢干戈甲冑諸戰守之具則因其能而分任之量用給財旬會其數以考其程課而輸於受藏之府若知規創裁制工作之利者聽其自言以類叅驗令殿前馬步司覆按可否以聞建炎併歸工部紹興復置長貳一員元仍宋舊置少監

少監

唐掌繕造甲弩之屬少監為之貳

六

武備精銳之器置

監總之輟爾郎曹往服少事

曲阜韓政制

監丞

唐武德初武器監置丞二人貞觀六年廢武器監開元

三年置軍器監有丞掌判監事凡材革出納之數工

徒衆寡之役皆督課焉宋神宗時置丞二人建炎三

年省紹興三年復置元亦置丞於少監之下

羣書要語欄錡分司武庫是藏兵之處

注受兵曰欄受甲曰錡張

集森森羽衛鶴膝皎而含霜凜凜旌旄犀渠光而奪

日注鶴膝矛也萬人强弩動黃間而連機百辟神刀輝丹

霞而吐鏐

注黃間機弩牙也西京賦

三屬之甲自合堅牢九石之

弓固宜良勁

唐張鷟集

至治之世安不忘危武庫甲兵之

備豈易忽也訓工程作置監統之而丞為之貳

曲阜李士

制又繕治戎械訓工程作之任置監典領禮秩甚隆

南豐制朕因時治安申嚴武備參釐監事罔非遴選

初察

制

古今事實

掌繕甲弩

唐武德十年置北都軍器監掌繕甲弩以時輸武庫總署二一曰弩署二曰甲坊

製造軍器

熙寧三年置軍器監以兩制二人領焉遣著作佐郎朱伯虎等齎精利軍器付逐州為式製造六年以呂惠卿

曾孝寬充判監制度皆著為式

邊備修舉

韋湊遷太原尹兼北都軍器監邊備修舉

唐書

制度精緻

宋神宗留意於軍器設監命侍臣董之前後講究制度
無不精緻卒著為式合一百一十卷辨材一卷軍器七
十四卷什物二十一卷雜物四卷添修及造弓弩式一
十卷

澹然無求

宋陳魯公康伯諡文正為軍器監康伯與秦檜有舊及在朝路澹然無求檜常稱其靖重焉

益知上卷

蕭正肅燧權司封進擬軍器監玉音以為允諸公益知

上卷

周益公集

古今文集

雜著

軍器監廳壁記

王述

將作名官古也軍器非古也周有六職百工居一焉漢以少府列九卿其屬考工專主器械軍器非古也其職古也有唐設官軍器與將作並列國朝具官無員而其職掌隸于三司熙寧制更然後軍器有監監有長有貳有丞簿率屬合治與唐六典建官不殊中興以來承平官府併省多矣而此職具存豈以用武之時所務為急雖時偃武所以除戎器者不可一日置耶由長而下異

時選用人才其間踐文昌登丞弼爛然可睹盛矣述也不肖由尚書郎得長是官日虞非材玷辱前列顧瞻石刻雖有名氏而未述官守建置之繇輒不少遜慨然書之併以姓名列於諸公之左來者繼之頽然瓦石珠璧後先遲莫有榮焉淳熙三年六月記

都水監

歷代沿革周官川衡之職漢太常大司農少府內史主爵中尉其屬官各有都水丞至成帝以都水官多

置左右使者各一人劉向護左都水使者是至哀帝
罷又有都船丞楫櫂丞晉置都水臺使者一人掌舟
楫之事官品第四隋開皇三年省都水入司農大業
五年改使者為監又置少監後改監為令少監為少
令煬帝置舟楫署丞二人唐因之改為都水署隸將
作龍朔改為司津監丞二人宋初欲修水官故專置
都水監以代三司河渠司事欲重其任以御史知雜
判監事後亦不常其官元置都水監掌川澤津梁舟

檄河渠之事街道司隸焉有監少監有丞掾街道司
有管勾官

羣書要語古山林之官曰衡掌諸池苑故稱水衡應劭

云主都水及上林苑故曰水衡

張晏云

令掌公私舟船及

運漕之事丞為之貳諸州運至京都者則經其往來理
其隱失使監漕監之

古今事實

陳勰巧思

陳颺有巧思遷都水使者楊伶期洛陽記云千金堤颺

所起

晉諸公贊

趙抃辭命

宋嘉祐八年以韓贄兼判都水監初置都水監以知雜御史判至是知雜趙抃辭以不知水事故命贄焉

古今事文類聚新集卷三十四

欽定四庫全書

古今事文類聚新集卷三十五

元 富大用 撰

殿司部

殿前都點檢

歷代沿革殿前司郎漢南軍五代之制有侍衛親兵及

殿前兩司蓋侍衛親軍起於後唐

石林燕語云侍衛親軍自梁起宣武

軍乃以鎮兵因舊號置在京馬步軍都指揮使而自將之蓋於唐六軍諸衛之外則於司兵至後唐明宗

遂改為侍衛親軍

殿前始於周世宗顯德元年宋初沿後周

有殿前都點檢在都指揮上太祖由此承禪後不置

馬侍衛親軍置都指揮使雖都虞候亦在殿前都指

揮使之上

淳化元年傳潛自殿前副都指揮使遷侍衛親軍馬步軍都虞候在殿前都指揮使

戴興之上咸平二年王超自殿前都指揮使遷侍衛親軍馬步軍都虞候

自王超罷職無

復任者而侍衛司馬軍步軍遂分為二并殿前號三

衙而馬步二軍始居殿前司之下焉祖宗以來三帥

不曾闕兩人若都帥闕難以從下超補

姚麟係殿前都虞候合陞

作步軍副都指揮使元祐七年樞密王岩叟言

政和四年詔殿前都指揮使

在節度之上殿前副都指揮使在正任承宣使之上殿前都虞候在正任防禦使之上中興以來主管殿前司一員其屬有幹辦公事主管禁衛各二員準備差遣準備差使點檢醫藥飯食各一員尋減幹辦公事一員增書寫機宜文字一員元仍後周制復置殿前都點檢左右副都點檢判官知事等員掌宮中及行役宿衛門戶關防等事兼督親軍總領左右衛將

軍符寶郎宿直將軍左右振肅宮籍監近侍器物尚
既尚輦鷹坊武庫武器頓舍諸局署官隸焉

羣書要語建安十九年王師東征余典禁兵行宮省

曹植

東征賦

錫以六纛總此八屯

溫公制

嘉其扈從之勤

同上除殿帥建

節制

內總七萃之師外分十連之任

同上除制

內典嚴衛外

秉節旄

同上除制

總領禁衛為王虎臣

董率王師

並同

進總凝嚴之務歷圖勁傑之資

王岐公行

屬嚴除之領

帥仗帥鉞於殿除

並同

置帥殿陞屬之董齊

南堂

就

列大廷典綏王旅

同上

祇護殿巖

東坡苗梗制

總朕虎臣典綏

王旅環列增肅周廬不驚

曲阜行無違制

營衛之士皆天下武

臣之高選虞度軍中之事是可非其人哉

荆公除宋守約制

宿

衛左右而虞度候視於軍中者其任甚寵

南豐擬制

掌殿前

諸班直及步騎諸指揮之名籍凡統制訓練番衛戍卒

遷補賞罰皆總其政令入則侍衛殿陛出則扈從乘輿

大禮則提點編排整肅禁衛鹵簿儀仗掌宿衛之事

四朝

制親衛諸軍虎旅百萬蓋天下武鋒之萃也既建三帥

以護周廬之師

國史

古今事實

號為控鶴

周世宗自高平之戰觀其退縮慨然有懲革之意又以
驍勇之士多為外諸侯所占於是詔募天下豪傑不以
草澤而俱送於闕下躬親試閱選武藝超絕又有身首
者分署為殿前諸班因有散員散指揮使內殿直散都
頭鐵騎控鶴之號

令寓捕蟬

宋守約為殿帥自入夏日輪軍校十數輩捕蟬不使得
聞聲有鳴於前者皆重笞之人頗不堪神宗一日以問
守約曰然上以為過守約曰軍中以號令為先臣承平
總兵殿陛無所信其號令故寓以捕蟬耳蟬鳴固難禁
而臣能使必去若陛下誤令守一障臣庶幾或可使人

上以為然

石林燕語

見髯將軍

劉猷以衆數萬欲犯建康楊和王沂中至藕塘與猷遇遣勁騎五千突入其軍賊兵亂沂中縱大軍乘之賊衆大敗猷曰適見髯將軍銳不可及果楊殿前也即以數

騎遁

中興系
年錄

為樞密使

張耆字元弼真宗朝為殿中都虞候是時大興宮室之役以奉符瑞宰臣丁謂欲殫國財力雖大臣不敢議耆上言土木之役不足以承天意耆後為樞密使

兼領二司

高武烈王瓊為殿前都指揮使管軍具缺王兼領二司
乃言曰先朝自殿前而下各置副都指揮使及都虞候
常有十人職近事親易以第進又使士卒預識威名緩
急臨戎上下附習此軍制之大要也上從之

言行錄

禮繼二府

熙寧九年殿前都指揮使郝質言往軍器監與判監劉
奉世會議軍器上批殿前馬步三帥朝廷待遇禮繼二

府事體至重寺監小官豈可呼召自今止令移文定議

續會

要

見宰執橫杖

三衙內中見宰執皆橫杖於文德殿後主廊階下唱喏
宰相出立階揖之外遇從官於通衢皆避馬此禮久廢
惟內中橫杖之禮至今不廢也

與學士分道

寶元康定余自貶所還京見王君貺初作舍人在坐見

殿前馬步軍聯騎立門外呈榜稱不敢求見舍人遣人謝之而去慶厯三年余作舍人三衙軍相逢而斂馬駐立前呵者傳聲太尉立馬步遣人謝之比舍人馬過然後敢行後余官于外十年而還遂入翰林與學士相逢分道而過更無斂避之禮蓋兩制漸輕三衙漸重

歐公歸田

錄

古今文集

雜著

論三衙軍制劄子

洪邁

臣仰惟陛下天資神武留意治軍將士感恩用命非復前比然臣區區管見獨以謂尤有可議者軍制不立名位不正是也請以祖宗之制大畧論之三衙軍職之大者凡八等除都指揮使或不常置外曰殿前副都指揮使馬軍副都指揮使步軍副都指揮使曰殿前都虞候馬軍都虞候步軍都虞候曰捧日天武四廂都指揮使龍神衛四廂都指揮使秩秩有序若登梯然不可一級

輒廢一或有闕即以功次遞遷降此而下則分營分廂
各置都副指揮使如捧日左廂第一軍都指揮使天武
右廂第二軍都指揮使之類邊境有事命將討捕則旋
立總管鈐轄都監之名使各將其所部以出事已則復
初二百年之間累聖相承皆用此術以制軍詰禁自南
渡以後觸事草創於是三帥之資淺者始有主管某司
公事之稱而都虞候以下不復設置乃以天子宿衛虎
士而與在外諸軍同其名號以統制統領為之長又使

遙帶外路總管鈐轄之名考之舊制則非法稽之事體則非是以陛下聖明能知人善任使所謂爪牙之士豈無數十人以待用者若法祖宗之制正三衙之名改諸軍為諸廂改統制以下為都虞候指揮使使宿衛之職預有差等士卒之心明有所係異時拜將必無一軍皆驚之舉於以銷壓未萌循名責實則環衛將軍雖不置可也如蒙聖慈或以為然乞下樞密討論故實圖議其當恐或可以少贊陛下布昭聖武之意茲事體大願陛

下深念之取進止

有旨付
樞密院

殿前左右二衛將軍

歷代沿革左右衛將晉文王建國所置隋煬帝改為左
右翼衛唐武德曰左右衛府上將軍各一人從二品
大將軍各一人正三品將軍各二人從三品掌宮宿
禁衛凡五府及外府皆總制焉凡五府三衛及折衝
府驍騎番上者受其名簿而配以職皇帝御正殿則
守諸門及內廂宿衛仗非上日亦將軍一人押仗將

軍缺以中郎將代龍朔中省府事左右金吾衛掌宮

中京城巡警烽候道路水草之宜凡翊府之翊衛及

外府飲飛番上者皆屬焉師田則執左右營之禁南

衙宿衛官將軍以下及千牛番上者皆配以職大功

役則與御史循行同龍朔二年改左右候衛曰左右

金吾宋六軍諸衛有左右金吾衛上將軍

秦曰中衛
漢武改曰

執金吾隋曰候衛所領軍事名飲飛以執禦非連漢

官宰尹曰吾禦也常執金革以禦非常縱騎二百人

與馬導從充滿於路世祖

左右衛上將軍
晉武帝分
中衛將軍

為左右衛各大將軍一人銀章青綬隋改置左右衛為左右翊衛

左右驍騎將軍

漢武

以李廣為驍騎將軍後省之光武改屯騎為驍騎晉大立晉臺以為宿衛官至隋煬帝改左右備身為左

右驍衛所領為豹騎唐置驍衛府龍朔去府字光宅改左右武威衛神龍復舊武威衛上將

軍

魏武為丞相有武衛營隋採其名置左右武衛府有大將軍光宅改左右楊衛龍朔復舊

屯衛

上將軍

隋煬帝置左右屯衛唐龍朔改為戎衛光宅改為左右豹衛

領軍衛上將

軍

魏武為丞相始置中領軍魏文又置領軍晉因之品第三金章紫綬宋齊領兵掌內禁兵唐別置領

軍衛大將軍龍朔改戎衛咸亨復舊

監門衛大將軍

漢魏以來城門校尉之職也隋置左

右監門府將軍煬帝改府字為衛唐置大將軍龍朔改為監衛

千牛衛上將軍

後魏有千

牛衛備身本掌乘輿御刀蓋取庖丁為惠文若解數
千牛而刃若發硃此刀可以備身因以名官階左右
府領千牛備身唐改為左右千牛府
龍朔改為奉神衛神龍改為千牛衛
諸衛大將軍諸

衛將軍並為環衛官無定員皆命宗室為之亦為武
臣之贈典大將軍以下又為武臣責降散官政和中
改武臣官制而環衛如故蓋雖有四十八階別無所
領故也靖康元年用御史中丞陳過庭言請遵藝祖
開寶初罷諸節度使歸環衛故事於是節度使錢景
臻等並為左右金吾衛上將軍又崇寧四年倣古修

立三衛官有郎一員中郎為之貳文武各一員博士
一主簿一親衛府有郎有中郎以后妃嬪御之家有
服親及翰林學士并管庫正任觀察使以上子孫充
勲衛府有郎有中郎以勲臣之世賢德之後有服親
太中大夫以上及正任團練使遙郡觀察使以上子
孫充翊衛府有郎有中郎以卿監正任刺史遙郡團
練使以上並以親兄弟子孫試充三衛郎治其府之
事率屬日直于殿陞長在左立起居郎之前貳分左

右文東武西立都承旨之後親衛立于殿上勲衛立于塏殿翊衛立于兩階衛士之前中興久不除授考

宗隆興詔學士院討論環衛官制度欲叅酌祖宗時

及唐太宗制度

詔曰朕惟祖宗選用將帥以崇武節外建方鎮內列環戶品式備具近來

環衛久不除授非所以儲材而均任也可依舊制應以才畧閑堪任將帥及久勤軍事暫歸休假之人並為環衛官更不換授止令兼領如節度使則領左右金吾衛上將軍

承宣使則領左右衛上將軍在內則兼帶在外則不帶以十員為額朝叅侍殿並依御帶體例宗室不在

此制仍不差戚里及非戰功人除改差主兵官合不
領環衛如皇城司帶衛器械之類仍許兼領元置殿
前左右二衛將軍其下有符寶郎四人宿直將軍左
右振肅等員

羣書要語虎賁氏掌先後王而趨以卒伍

周禮

祈父子王

之爪士

詩

潘崇為太師且掌環列之尹

左傳

楚君戎分為

二廣廣有一卒右廣初駕數及日中左則受之內官序

當其夜以待不虞

同上

烈烈楊侯實統禁戎

文選楊
荊州誅

交戰

之下周廬肅然

白集李演制

王者法鈞陳設環列非勲勤之

將信近之臣則何以久張爪牙轉置股肱者也 移領

左廣 八屯之警巡七萃之勤惰爾為其正盡察得之

並同上 前以忠勞選登戎衛能訓勇力之士以備時使申

誰何之人以備徼巡

李君佐制

軍有羽林用法星象統之爪

士以拱辰居

同上

俾領上軍仍遷右廣

王士則制

統良家之騎

士訓期門之材官

同上

周設七萃漢列八屯皆所以拱衛

王宮肅嚴徼道

鄭何制

國家設十二衛猶漢之有南北軍

而左右羽林尤稱親重自諸衛而移鎮者謂之美遷掌

勾陳而護建章備警巡而嚴武衛

王元輔制

環太微諸星有

上將次將之位所以拱衛宸極誰何不若天子置上將

軍以禦侮率是道也

元集張奉國制

天子六軍必有材官飲飛

超乘挽強之士在焉董之以威待之以信分八舍之衆

寡均二廣之逸勞不吳不揚不掉不挫皆將軍之力也

是以李大亮上直禁中而文皇甘寢則心腹爪牙之任

斯不細矣

于季友制

熊羆宣力輦轂無塵內訓却非之士外

察何留之禁

徐集

自叅戎秩久衛宸階

常相除右金吾制

曉傳銀

祭之符夜警金吾之漏

同

北落親兵夾疇宮省

杜牧梁崇幹制

典兵於禁門之內立侍於殿陛之中

張方直制

宮崇環衛職

實司武

王釗制

官我正衛

吳正制

禁旅總蘭錡之兵

李文鈞饒集

陳肅肅彰北極之威靈錡仗森森表南端之壯麗九旗

揚旆日熾星流五輅鳴鑾龍輶鳳轄

張鷟傳

武夫拔燕之

服羽騎雲屯期門珥鶡之冠旄頭宿設

同上

委禁垣之提

警

胡文恭行王從善制

環設衛官拱戶宸極

余樸制

列衛宮邸

曲阜集

千牛帶刀宿衛王室環列之尹執金為貴

同上

仕宦至執

金吾古今所榮重也

白集

詩句一生唯羨執金吾

王翰詩

古今事實

入直殿中

羊祜遷中領軍悉統宿衛入直殿中執兵之要事兼內

外

晉中興書

分司丹禁

梁有左右中郎將以分司丹禁侍衛左右

隋書

典飛騎

姜確字行本太宗選趨才衣五色袍乘六閑馬直屯營宿仗內每出幸即以從拜行本左屯衛將軍分典飛騎

佩橫刀

唐王及善除右千牛衛將軍帝曰以爾忠謹故擢三品要職爾佩大橫刀在朕側亦知此官貴乎

詔乘馬

唐高祖以李粲為右監門衛大將軍曰卿忠勇之譽聞於隋今年齒雖邁筋力未衰監門之職非公莫可粲以年老辭高祖曰藉公處分爾豈欲煩公筋力耶於是詔粲自非殿庭皆乘蜀馬論者榮之

延入閣

唐宇文士及擢右衛大將軍太宗延入閣語或至夜分休沐馳召

察城中事

唐德宗時金吾大將軍李翰好伺察城中細事

舊史

管天下兵

臧盾遷中領軍管天下兵要監局事多盾為人敏瞻有風力長於撥繁職事甚理天監中吳平後蕭景先居此職甚著聲稱至是復繼之

梁書

天子押衙

唐邢濟為金吾將軍曰我金吾天子押衙以死生從安

敢自脫

駙馬都尉

唐阿史那社尒率衆內屬十年入朝授左驍衛大將軍
尚衡陽長公主為駙馬都尉典衛屯兵

槐下聽事

隋高顗拜左衛大將軍每坐朝堂北槐下聽事其樹不
依行列有司請伐之上特不令剪去以示後人見重如
此

俸餘納官

唐田仁會麟德中轉右金吾將軍所得給外有餘輒以納官時人頗譏其要名而仁會強力疾惡晝夜巡警自京城至衢路越法無不立發每日延引百餘人躬自閱罰畧無寬者京城貴賤咸憚之

許作領護

羊琇少與武帝相親謂帝若富貴見用作領護各十年帝戲而許之及即位擢琇為左衛將軍

常領宿衛

漢耿秉為人威重有謀畧拜執金吾每行幸秉常領宿衛

金帶投地

隋皇甫無逸轉右武衛將軍王世充篡棄母妻斬關自歸騎追及無逸解金帶投之地

駟導盈巷

唐張嘉禮嘉正弟也有幹畧方嘉正為相時任左金吾衛將軍昆弟每上朝軒蓋駟導盈閭巷時號所居坊曰

鳴珂里

摧擿奸伏

唐宗室晦遷金吾將軍摧擿奸伏無留隱

不畏強禦

陶回拜領軍將軍回性方範不畏強禦丹陽尹桓景頗能供事司徒王導甚悅之回常慷慨論景非正人不宜狎會熒惑守南斗回曰公以明德輔弼聖主當親正遠邪而與桓景造膝熒惑何由退舍導深愧之

晉中興書

蒞官勁正

屈突通為右武衛將軍蒞官勁正有犯法者雖親無縱
其弟蓋長安令亦以方嚴顯時人語曰寧食三斗葱不
逢屈突通寧食三斗艾不逢屈突蓋

論奏風采

李景畧召為羽林衛將軍對德宗延英殿論奏衍衍有
大臣風采

劾徙妖巫

唐田仁會為右金吾丞傳鬼道惑衆自言能活死人市里尊神仁會劾徙於邊

捕係惡少

唐杜中立歷左右金吾衛大將軍京師惡少優戲道中具騶唱呵衛中立部捕係立箠死

警衛禁街

貞元十七年金吾衛大將軍李翰奏警衛禁街必資澄

肅

續通
典

明閑宿衛

唐趙道興貞觀初歷遷武侯中郎將明閑宿衛號為稱

職

太平御覽

累從征討

唐柴紹高祖即位拜左翊衛大將軍累從征討歷國公

多識舊儀

唐宗室若水為左金吾衛大將軍兼通事舍人多識舊儀每宣勞揖輦進止有可觀者

臨難不屈

唐劉洪基京師平功第一授右驍大將軍討薛舉戰淺水原八總管軍皆沒惟洪基一軍戮力矢盡為賊拘帝以臨難不屈優護其家

本傳

謀亂不從

唐楊思訓從幸并州右武衛大將軍慕容寶節夜要思訓與謀亂思訓不從寶節懼毒酒以進思訓死妻訴之流寶節嶺表斬之

賊至彈琵琶

唐柴紹轉右驍衛大將軍吐谷渾党項寇邊賊據高射
紹軍紹安坐遣人彈胡琵琶

使至不開門

唐段志玄為左驍衛大將軍文德皇后之葬勒兵衛章
武門太宗夜遣使至志玄拒曰軍門不夜開使者示詔
志玄曰夜不能辨比旦帝歎曰真將軍

清儉常布衣

吳隱之為中領軍清儉每月所得祿裁留身糧餘悉贍親族常布衣不完妻子不需寸祿

清謹無纖隙

阿史那忠蘇尼太子也資清謹時為右驍衛大將軍宿衛四十八年無纖隙時人比之金日磾

得卿勝數萬

唐李嗣業為左金吾將軍祿山反上在靈武詔嗣業赴行在謁見上曰今日得卿勝數萬衆事之濟否實在卿

也

用卿重此官

唐韋湊遷右衛大將軍玄宗謂曰故事諸衛大將軍與尚書更為之近時職轉輕故用卿以重此官其母辭

躍馬萬衆中

唐秦叔寶每敵有驍將銳士出入夸衆者秦王輒命叔寶往取之躍馬挺鎗刺於萬衆中莫不如志及平隱巢功拜左武衛大將軍

領兵戍咸陽

唐張獻甫累遷至右金吾衛將軍李懷光叛吐蕃盜邊
獻甫領禁兵戍咸陽累年兵農悅安

典羽林三十年

張延師為左衛大將軍性謹畏典羽林三十年未嘗有

過

職林

授宿衛三十年

唐薛平授右衛將軍三十年

命羣臣舉善射

唐泉獻誠天授中以右衛大將軍兼羽林衛武后嘗出金幣命宰相南北衙羣臣舉善射五輦中者以賜內史張光輔舉獻誠獻誠讓王鈐大將軍薛吐摩支摩支固辭獻誠曰陛下擇善射者然皆非草人恐唐官以射為恥不如罷之

仕宦當作金吾

漢世祖微時歎曰仕宦當作執金吾

討論環衛制度

隆興間孝宗討論唐太宗環衛制度湯思退曰環衛官
唐時有職事宋朝無職事祖宗舊制自方鎮罷皆歸環
衛故也

古今文集

雜著

原十六衛

唐杜牧

國家治踵隋制開十六衛將軍總三十員屬官總一百

二十八員署守分部夾峙禁省厥初歷今未始替削然
自今觀之設官言無謂者其十六衛乎本原事迹其實
天下之大命也始自貞觀中旣武遂文內以十六衛畜
養武臣外開折衝果毅府五百七十四以儲兵伍或有
不幸方二三十里為寇土數十百萬人為寇兵蠻夷戎
狄踐踏四作此時戎臣當儲兵居外至如天下平一暴
勃消削單車一符將命四走莫不信順此時戎臣當提
兵居內也官為將軍綬有朱紫章有金銀千百騎趨奉

朝謁第觀車馬歌兒舞女念功賞勞不於曲賜所部之

兵散舍諸府上府不越一千二百人

五百七十四府凡有四十萬人

三

時耕稼襁褓耒耨一時治武騎劍兵矢裨衛以課父兄

相言不得業他籍將府伍散田畝力解勢破人人自愛

雖有蚩尤為師雅亦不可使為亂耳及其當居外也緣

部之兵被檄乃來受命於朝不見妻子斧鉞在前爵賞

在後以首爭首以力搏力飄暴交梓豈暇異畧雖有蚩

尤為師雅亦無能為叛也自貞觀至于開元來百三十

年間戎臣兵伍未始逆篡此聖人所能柄統輕重制障
表裏聖筭神術也至于開元末愚儒奏章曰天下文勝
矣請罷府兵詔曰可武夫奏章曰天下力强矣請搏四
夷詔曰可於是府兵內劇邊兵外作戎臣兵伍湍奔矢
往內無一人矣起遼走蜀繚紹萬里事五強寇
奚契丹吐蕃雲
南大十餘年中亡百萬人尾大中乾成偏重而天下掀
食國然根萌燼然七聖旰食求欲除之且不能也由此觀之
戎臣兵伍豈可一日使出落鈴鍵哉然為國者不能無

也居外則叛居內則篡使外不叛內不篡兵不離伍無
自焚之患將保首領無烹狗之論古今已還法術最長
其置府立衛乎近代以來於其將也弊復為甚也人罵
曰廷詔命將矣名出視之率市兒輩益多賂金玉負倚
幽陰折券交貨所能也絕不識父兄禮義之教復無慷
慨感槩之氣百城千里一朝得之其強傑憤勃者則撓
削法制不使縛已斬族忠良不使違已力壹勢使罔不
為寇其陰泥巧狡者亦能家筭口斂委於邪倖由鄉市

公去郡得都四履所治相為別館或一夫不幸而壽則
戛割生人畧匝天下是以天下每每兵亂涌溢齊人乾
耗鄉黨風俗淫窳衰薄教化恩澤雍抑不下召來災沴
被及牛馬嗟乎自愚而知之人其盡知之乎且武者任
誅如天時有秋文者任治如天時有春是天下不能倒
春秋是豪傑不能總文武是此輩受鉞誅暴乎曰於是
乎在某人行教乎曰於是乎在欲禍蠹不作者未之有
也伏惟文皇帝十六衛之旨誰復而原其實天下之大

命也作原十六衛

符寶郎

歷代沿革前漢有符節令丞隸少府有尚符璽郎後漢
令一人六百石為符節臺率主符節事凡遣使掌授
節尚符璽郎中四人在中主璽及虎符竹符之半者
令史二百石掌書唐武后改符璽郎為符寶郎元置
符寶郎四人隸殿前司

古今事實

掌天子璽

符節令掌天子璽符及節旄幢有銅虎竹使符中分二

人留其半付受為信

環濟要畧

次中丞位

符節令兩梁冠于古位次御史中丞領上符璽

應劭漢官考

不肯受璽

漢霍光初輔少主政自己出殿中嘗有怪羣臣相驚光召尚符璽郎郎不肯授光光欲奪之郎按劍曰臣頭可

得璽不可得也光甚誼之明日詔增郎秩二等

本傳

古今文集

雜著

符節令箴

崔瑗

在尊曰璽在卑曰印防不可不審制不可無常如姬竊印晉鄙受殃符臣司節敢告不剛

宮籍監

歷代沿革漢衛尉王宮闕之內衛士於垣下為廬各有

員部凡居宮中者皆施籍於門按其姓名若鑒巫諸人當入者審其印信然後內之與有籍者皆復有用木長二寸以所居官兩字為鐵印分符當出入者按籍畢復齒符局引內之也當出入者令執御者名宦傳呼前後以相通夜有行者輒前曰誰所以重慎宿衛也元置宮籍監有監副監監丞之職

尚廐局

歷代沿革漢太僕屬官有大廐未央家馬三令各五丞

一尉主乘輿及宮中諸馬其後置左駿廐令別飼乘輿御馬魏有驊騮廐令晉太僕統乘黃驊騮龍馬等廐令過汴之後或省或置哀帝省驊騮為門下之職宋齊因之梁太僕統龍廐內外廐陳因之後周有左右廐各上士一人北齊太僕寺統驊騮左右龍等署隋太僕寺統龍廐署唐改為典廐署令領執馭駕七等宋初有天廐雍熙中以天廐改為左右驂驪院掌司國馬景德中始增置羣牧使副都監判官以領廐

牧之政神宗廢羣牧使乘輿法物則歸車輅院養國
馬則歸左右驂驪院天駟監而總於太僕寺馬元置
尚廐局有使副使掌廐都副轄等員隸殿前司

羣書要語牧師掌牧地皆有厲禁而頒之孟春焚牧中

春通淫掌其政令校人掌王馬之政

周禮

駟牝三千

詩

駟

駟牡馬在坰之野

魯頌

新作延廐書不時也

左傳

廐焚子退

朝曰傷人乎不問馬

語

天馬徠從西極

漢禮樂志

天駟星主

國馬

晉天文志

飛龍掌天廐之閑

李元龍集

古今事實

萬歲為使

唐張萬歲為羣牧使

毛仲領監

王毛仲領羣牧監

並唐書

古今文集

雜著

監牧碑頌

天子十二閑馬六種閑為一廐馬二百一十六應乾之
筴也六廐成校五良一駑是之謂小備校有左右閑成
十二合月之數也駑馬三良馬之數凡三千四百五
十六是之謂大備故春祭馬祖夏祭先牧秋祭馬社冬
祭馬步敬其本也日中而出日中而入焚原燎木除蓐
蠶廐時其事也潔泉美薦牙涼棧溫翹首面陸交頸相
劇宜其性也攻駒教駢講馭藏僕刻之剔之羈之筴之
就其才也乾道為良坤元利牝駒從渥水駿發中廬屈

產貴其能鳴鴈門多其美脊豈止宗生奠地族絕汧西而已哉

尚輦局

歷代沿革周禮小司徒中大夫二人掌六畜車輦又巾車下大夫二人掌王后之五輅輦車組輓有翬羽蓋故古謂人牽為輦宋萬以乘車輦其母秦始皇乃去其輪而輿之漢代遂為人輦以乘後漢有乘輿六輦魏晉小出而乘之及過江而亡太元中謝安率意而

作及破苻堅得之形制無差大小如一時人嗟其默
識宋武執慕容超獲金鉦輦古之輦輿大率以六尺
為度齊武帝造大小二輦雕飾甚工下欄轆轤悉金
花銀獸梁大輦中方八尺左右開四望金鸞棲輓隋
有六輦大禮皆乘之秦漢魏晉並太僕屬官車府令
掌之東晉自太僕遂隸尚書駕部宋齊梁陳車府丞
乘黃令丞掌之後魏北齊則乘黃車府令兼掌之後
周則司車輅主之隋又乘黃車府令兼掌之煬帝置

殿內省尚輦局奉御二人正五品唐因之為漢五品
上龍朔二年改奉舉大夫咸亨元年復舊例宋御輦
院掌乘輿步輦供奉及宮闈車乘之事神宗改為車
輅院廢羣牧司供乘輿法物則歸車輅院有監官三
員建炎三年罷紹興十二年詔車輅院吏依舊例減
半差元尚輦局置使副使典輿都副轄收支都監等
員

羣書要語巾車氏掌公車之政令辨其用與其旂物而

等叙之以治其出入之五路

禮周

典路掌王及后之五路

注同上

尚輦奉御掌輿輦繖扇之事分其次叙而辨其名

數直長為之貳凡大朝會則陳於庭大祭祀則陳於廟

唐六典云

輦有七一曰天鳳二曰大芳三曰仙遊四曰小輕

五曰芳亭六曰大玉七曰小玉

同上

古今事實

鈎車之制

夏后氏因鸞車而制鈎車俾車正奚仲建旂尊卑上

下各有等級

通典

司輅之職

周巾車氏掌王五輅有玉金象革木之制至秦惟乘金根車漢承秦制以為乘輿晉武帝始備五輅令掌為天子法車後周置司輅之職皇帝之輅十有二等

武庫署

歷代沿革周武王伐紂散牛放馬倒載干戈韜以虎皮而藏諸武庫武庫之設由來尚矣漢執金吾屬官有

武庫令一人丞二人晉隋亦有武庫令皆衛尉統之
唐武庫令丞各二人有府史監事典事掌固等員令
之職掌藏邦國之兵仗器械辨其名數以備國用丞
為之貳元置武庫署有令丞

古今事實

職閒無事

杜欽為大將軍武庫令職閒無事欽所好也

終當大到

樂廣為武庫令黃慶餘陶侃謂此人終當大到

武器署

歷代沿革唐武器署令丞各一人府二人有事監事典
事掌同等員令之職掌在外戎器辨其名物會其出
入丞為之貳凡大祭祀大朝會及巡幸則納於武庫
供其鹵簿元武器署有令丞亦唐制也

頓舍官

歷代沿革周禮有掌舍掌行所解止之處帷幕幄帟之

事漢少府屬官有守宮令丞掌宮殿陳設魏殿中監
掌帳設監讓之事晉宋已下其職並在殿中監隋煬
帝置殿內監改殿內局為尚舍局置奉御二人正五
品唐因之龍朔二年改奉宸大夫咸亨復舊元改為
頓舍置諸直長

古今事文類聚新集卷三十五

欽定四庫全書

古今事文類聚新集卷三十六

元 富大用 撰

諸庫局部

武衛庫

歷代沿革周虎賁氏舍則守王閼王在國則守王宮漢
謂之北軍置羽林郎材官取三輔良家之子自給鞍
馬唐謂之北衙左右羽林軍大將軍各一人正三品

將軍各三人從三品掌統北衙禁兵督攝左右廂飛
騎儀仗大朝會則周衛階陞巡幸則夾馳道為內仗
凡飛騎南上者配其職有勅上南衙者大將軍丞墨
勅白多於金吾引駕仗宮與監門奏覆降墨勅然後
乃得入宋因之舊號武德司太平興國詔改皇城司
政和官制改皇城使為武功大夫而其職任則選內
外通領焉

皇城司以入內兩都知主內判內定事入內都知無不與知者惟宿直諸班禁衛畧

無統攝而皇城司親從官數千人乃命武臣二員同兩都知主之而殿前復不預此祖宗處軍政深意也

官制
舊典

紹興中詔行宮禁衛所改為行在皇城司係專

掌禁庭出入依祖宗法不隸臺察

先是殿中侍御史
司乞皇城司隸臺

察已從其請
至是遂不行

元置武衛庫有都指揮使副都指揮使

掌防衛都城及警捕之事

羣書要語嚴衛禁兵

白六帖

國家設十二衛猶漢之南北

軍而左右羽林尤稱親重

白禁王
元輔制

古今事實

檢校閉啓

梁乾化六年詔曰端闈正門也宜以時開敞用達陽氣
委皇城使檢校閉啓車駕出則闔扉

五代史

掌諸門開闔

唐城門郎掌京城皇城宮殿諸門開闔之節奉其管鑰
而出納之開則先外而後內闔則先內而後外所以重
中禁尊皇居也候其晨昏擊鼓之節而啓閉之

續通典

文臣少卿

宋朝以皇城使比文臣少卿選人才優長者一員供職

謂主管皇城司也

官制
舊典

御帶主管

政和改制之後皇城司依舊以橫行或御帶二員主管

同上

古今文集

律詩

寄羽林盧大夫

釋無可

將軍直禁闈繡服耀金羈羽衛九天靜英豪四塞知望

雲回翔鴈隔水射窮麋門風荀氏敵劍藝霍家推

法物庫

歷代沿革後唐有修裝法物使宋多以内臣與本司修飾焉其職掌用禮院御史臺兵部吏人如故儀衛衣物鹵簿皆掌元置法物庫有使有副有直長

交鈔庫

歷代沿革宋有交引庫隸太府寺掌給印出納交引錢之事元置交鈔庫有交鈔庫使副使鈔引庫使副使

古今文集

雜著

交引庫廳壁記

吳必大

交引庫外府屬之一交引所由造也若稽國朝惟四川
用交子法引鈔竿請則昉制於汴都六飛南蹕詔造用
交子如四川居無幾何改為關再改為會自會子法立
領以他局今庫惟引鈔出焉託尺紙之書行千金之積
良賈牟大利得此恃亡恐不得則於法為私有夫國以

義為利權天下之貨而制其柄而使服其政令非利而為之所以理財正辭禁民為非是之取爾庫無他貯儲惟官紙若朱常日文書行梓以墨銅籀以紅櫛比者題號者胥史工徒魚貫坐各力乃事既成特白丞簿白是當書既書乃收數而授之權貨務商族趨焉廳廡粗備踵故以火禁筦庫氏勿得處其間舍隸人保逆旅旬用三日入聽治啓閉出內作鉗尾字退則皆鴈鴛境囊欺索蠹檢核無所於用余嘗居是官持不可詣公府言狀

改前之為蓋自寶祐癸丑冬始也廳舊無壁記大博四
明王君似道而上無稽焉當王君時撤老屋新之礮巨
石於庭曰是將刻記會秩滿去弗果後六年余來屋比
入於壞亟起圖之役甫休余亦去時甲寅七月也又後
八年景定壬戌秋古杭金君應桂繼請於朝得楮緡萬
是葺是營增多于前功且刻石以成王君志蓋二十年
間先後三人而斯石始克立顧有所待耶世之以便文
處癡事以傳舍視公宇作者之攸始求者之弗圖余甚

為此懼有能不苟而可心誠求之雖治天下亦如此屋
若石矣是可書余故泚筆承金君之命且以諗後之君
子云

左右廂

歷代沿革宋大中祥符元年置京新城外八廂真宗以
都門之外居民頗多舊例惟赤縣尉主其事至是特
置廂吏命京府統之天禧五年增置九廂熙寧三年
五月詔以京朝官曾歷通判知縣者四人分管京城

四廂凡民有鬪訟事輕者得以決遣九月詔許留後使臣兩員分左右廂管勾元祐元年知開封謝景溫請於新城內外左右置三廂通為四廂紹興中臨安府先依開封例於城外南北廂置主管公事近及於城內左右廂添置官兩員分減在城詞訟其後臣寮言將在城左右廂廢置其廂官兩員移往城南北廂元置左右廂有廂官受給官祇應司令丞直長

古今事實

遂除御史

宋蔡確字持正韓維知開封府奏為管勾左右公事後知府劉庠責確廷叅確謂藩鎮辟除掾屬乃有此今輦轂下比肩事主雖故事不可用庠不能屈神宗聞而嘉之後因臺官有闕執政奏乞除官神宗曰只用不肯堦墀見劉庠者遂除監察御史

邵伯溫撰確傳

惠民司

歷代沿革周醫師救萬民之疾苦宋神宗設太醫局熟

藥所於京師崇寧中增置七局揭以和劑惠民之名
修置給賣各有攸司又設收買藥材所以革偽濫之
弊紹興六年置藥局以行在太醫局熟藥東西南北
四所為名內將藥局一所以和劑局為名從戶部王
俟之請也詔和劑局置監官文武各一員差京朝官
與大使臣十八年朝旨熟藥所依在京改作太平惠
民局元置惠民司有令有直長

古今事實

救民疾苦

宋政和四年尚書省言修合賣藥所本周官醫師救民之意今只以都城四壁并商稅院東出賣熟藥非創置惠民之意矧今局事不隸太醫

能大其官

范成大監行在太平惠民和劑局堂吏丐藥不獲以朝旨下所隸太府寺蒐細故杖吏逞憾公白戶部侍郎汪應辰杖本府吏已能大其官修壽皇類編高宗聖政以

公為檢討官兼敕令所近世局務無修書者人以公為宜

四方館

歷代沿革唐四方館使以通事舍人判隸中書省五代
晉始以卿監專判館宋四方館在朝堂門外使闕則
客省引進閣門使副兼掌淳化四年改置使名掌通
事分番供奉宣贊之名籍文武官正衙見謝國忌賜
香諸道月旦正至章表郊祀朝會蕃官貢舉人進奉

使京官致仕官道釋父老陪位之事元祐令四方館使正六品紹興三年詔客省四方館使正六品四年詔依舊制隸中書省元置四方館有使副

古今事實

熟於館事


晉天福二年檢校兵部尚書陳瓚守衛尉卿兼通事舍人判館事以其熟於宣導故雖位三品猶總管事

謂之館主

舊儀於通事舍人中以宿長一人總之館事謂之館主
凡四方貢納及章表皆受而進之

謂之館老

宋咸平四年故事閣門長一人判四方館謂之館老又
續通典以為唐故事



古今事文類聚新集卷三十六